



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Ispesyal nga Isyu  
Marso 29, 2009  
[www.philippinerevolution.net](http://www.philippinerevolution.net)

# Mag-angkon sang mas daku pa nga kadalag-an sa inaway banwa


*Mensahe sang Komite Sentral  
sang Partido Komunista sang Pilipinas  
Marso 29, 2009*

**L**abaw ang kalipay nga ginasaug naton ang ika-40 nga pagkatukod sang Bag-ong Hangaway sang Banwa (BHB) subong nga Marso 29 sa idalom sang absoluto nga pagpamuno sang Partido Komunista sang Pilipinas. Halin sadto, nag-angkon ang BHB sang daku nga kadalag-an sa rebolusyonaryong paghimakas sang pumuluyong Pilipino para sa pungsodnon nga kahilwayan kag demokrasya paagi sa malawigan nga inaway banwa batuk sa imperyalismong US kag mga lokal nga mapanghimulos nga sahi sang daku nga kumprador kag agalon nga mayduta.

Ginpanginbulahan naton ang tanan nga mga Pu-  
lang kumander kag hanga-  
way, mga kadre  
kag katapu

sang Partido sa BHB kag ang malapad nga masa sang pumuluyo sa ila natipon kag subong nga mga kadalag-an. Ginahatag naton ang pinakamataas nga pasidungog sa tanan naton nga rebolusyonaryong martir kag baganihan. Ang aton mga kadalag-an halin sang gintukod ang Partido kag BHB naangkon naton bunga sang aton matayog nga rebolusyonaryong prinsipyo, kaisog, pasensya, pagpursiger, matutom nga mga paghimakas kag mga sakripisyo.

Ang BHB subong amo ang pinakadaku nga rebolusyonaryong hangaway nga napundar sang pumuluyong Pilipino sa bilog nga pungsod. Mas daku kag mas mabaskog ini sa rebolusyonaryong hangaway sang Pilipinas nga nagbato sa kolonyalismong Espanyol sadtong 1896-1898 kag batuk sa imperyalismong US umpisa 1899. Mas daku kag mas mabaskog man ini sa Hukbong Mapagpalaya ng Bayan laban sa



Hapon sadtong 1942-45 kag Hukbong Mapagpalaya ng Bayan umpisa 1949.

Labi nga mas mabaskog subong ang BHB sangsa nalab-ot sini sadtong dekada 1980. Nangin maayo ini nga pwersa sa pagpakigbato sa kaway, sa pagpalapnag sang rebolusyonaryong propaganda, sa pag-organisa kag pagpahulag sa masa sa mga kampanya nga nagasulong sang ila pungsodnon kag demokratikong kinamatarung kag mga interes. Ini ang pangunahon nga organisasyon sa paglutos kag pagpukan sa rebolusyonaryong estado kag pagtukod sang demokratikong gubyrno sang banwa. Madinalag-on sini nga naangot ang rebolusyonaryo nga armadong paghimakas, reporma sa duta kag pagtukod sang baseng masa.

Nakatukod ini sang kusog paagi sa paglunsar sang mga taktikal nga opensiba sa halintang sang estratehikong depensiba kag ginapanan-aw sini ang paglunsar sang mas daku nga opensiba sa masunod nga mga halintang sang inaway banwa. Ginaatubang sini ang demanda para sa reporma sa duta kag tanan nga iban pa nga kinahanglanon para sa pungsodnon kag kahilwayan sosyal. Gani nakuha sini ang pagpasakup kag pagsuporta sang masang mangunguma kag bilog nga pumuluyo sa armadong rebolusyon.

Paagi sa BHB, nakatukod ang pumuluyo sang mga rebolusyonar-

yong organo sang demokratiko nga gahum pangpulitika. Nagakuha sang kusog ang mga ini sa mga organisasyong masa kag kampanyang masa. Uyat ang BHB bilang armas, nagauswag ang demokratikong gubyrno sang banwa kag nagapakadto sa paglutos kag lubos nga pagbaylo sa reaksyunaryong estado sang dalagku nga kumprador kag agalon nga mayduta.

Nakabenepisyo ang BHB sa Una nga Dungganon nga Kahublagan Panadlong batuk sa mga oportunista nga Lavaista kag sa kriminal nga hubon Taruc-Sumulong sadtong dekada 1960 kag 1970 kag sa Ikaduha nga Dungganon nga Kahublagan Panadlong sadtong dekada 1990. Paagi sa mga kahublagan pagpanadlong nga ini, liwat napalig-on sang BHB ang mga basehan nga rebolusyonaryong prinsipyo kag natigayon nga mapangibabawan ang mga kasaypanan kag kahinaan sa ideolohiya, pulitika kag organisasyon kag permi nga nagabangon nga mas labing mabakod.

Napaslaw sang BHB ang daku nga hangkat sang mga kampanya sa pagtapna sang militar sang pasista nga diktaduryang Marcos kag mga nagsunod nga rehimen. Ginpamatud-an sini sa bilog nga kalibutan nga madinalag-on nga mapasulong ang malawigan nga inaway banwa sa isa ka pulo-pulo nga pungsod nga malakolonyal kag malapyudal nga ginagamhan sang imperyalismong

US kag sang pinakatuso kag pinakamapintas nga papet.

Paagi mismo sa pagbato sa armado nga kontra-rebolusyon naga-baskog kag nagasulong ang BHB. Lubos sini nga napaslaw kag nalutos ang Oplan Bantay Laya I (OBL I) sadtong 2001-2006 kag ang Oplan Bantay Laya II (OBL II) halin 2006. Ang mapintas nga atake sang rehimeng US-Arroyo batuk sa malapad nga masa sang pumuluyo, lakip ang mga komunidad kag mga indi armadong aktibista halin sa lain-lain nga saray sang katilingban ang naghamulag kag nagpaluya sa rehimen nga ini kag nagsamad sini sa mata sang bilog nga kalibutan.

Ginaangkon subong sang BHB ang mataas nga prestihiyo bilang isa ka rebolusyonaryong pwersa. Nabantog ini bilang isa ka maisog nga pwersa pangbato kontra sa kagarukan sang reaksyunaryo nga nagaharing sistema sa Pilipinas kag batuk sa subong nga papet, korap, mapintas kag butigon nga rehimen. Sa paglala sang krisis sang pangkalibutanon nga sistemang kapitalista kag lokal nga nagaharing sistema, ginahingalitan sang BHB ang tuman ka paborable nga kundisyon para sa inaway banwa kag nagaangkon ini sang mas daku nga kadalag-an kag nagatipon sang kusog. Ginasinggit sang malapad nga masa sang pumuluyo nga pasingkion ang inaway banwa kag isulong ang tanan nga porma sang paghimakas.

---

## I. Nagadalom nga depresyon sang pangkalibutanon nga kapitalismo

Sining ulihi lang ginpabugal sang mga imperyalista kag mga sumulunod sini nga ang China, Soviet Union kag iban pa nga estado nga rebisyunista, nga ginapaguwa nila nga mga sosyalista, napun-an sadto sang kinagamo kag ginatigayon ang lubos kag hayagan nga pagpanumbalik sang kapitalismo. Gindeklarar nila nga wala sang paglaum ang kahublagan para sa pungsodnon nga kahilwayan kag sosyalismo kag ang kasaysayan indi na maglampas sa kapitalismo kag li-

beral nga demokrasya. Sugod sadto, naglunsar ang mga monopolyo nga kapitalista sang mga opensiba sa ideolohiya, ekonomya kag militar batuk sa sahing mamumugon kag mga rebolusyonaryong pwersa. Sa subong, nagakarusdak halin sa sulod ang pangkalibutanon nga sistemang kapitalista.

Ang pinakamalala nga krisis sa pinansya kag ekonomya sang pangkalibutanon nga sistemang kapitalista halin sadtong Great Depression<sup>1</sup> madasig nga naglapta

halin sa US bilang sentro kag pada-  
yon nga nagadalo nga wala sang  
maathag nga katapusan. Nagakadto  
na ini sa pagka-Greater Depression  
kag nagapanghalit sa mga pwersa  
sang produksyon kag sa kabuhi sang  
malapad nga masa sang pumuluyo sa  
bilog nga kalibutan. Sadto pa sang  
ikaduha nga tunga sang 2007 nagsu-  
god ang subong nga depresyon, pero  
pilit gihapon ini nga ginatawag nga  
simple nga resesyon sang mga im-  
peryalista kag lokal nga reaksyunaryo.

Narusdak na ang polisiya sang  
“neoliberal nga globalisasyon.” Tu-  
man nga napaslawaan ini nga lubaron  
ang permenante nga tendensya sang  
monopolyo nga kapitalismo nga mag-  
untat kag magpadulong sa nagapala-  
la nga siklo sang pagbangon kag  
pagtumba. Ang imperyalismong US  
kag ang bilog nga pangkalibutanon  
nga sistemang kapitalista ginaatake  
sang dimalas kag madulom nga eko-  
nomya. Lapnagon nga ginapakama-  
laut ang dogma sang “hilway nga ba-  
ligyaanay” bilang isa ka ipokrito nga  
islogan sang monopolyo burgesya pa-  
ra isapribado ang ganansya kag “pag-  
sosyalisa” sang pagkaputo.

Pila ka trilyon nga dolyar na ang  
ginhatag sang gubyernong pederal  
sang US sa mga higanteng bangko kag  
iban pa nga korporasyon pinansyal ha-  
lin 2007. Ulihi kag kulang pa ang mga  
tikang sini para sa temporaryo nga bu-  
lig sa gamay nga porsyento sang pila  
ka pulo ka milyon nga pumuluyo nga  
nadulaan sang trabaho, balay, sinup-  
tan, pondo nga pangpensyon kag mga  
benepisyo sosyal.

Tatlo ka dekada nga ginpatuman  
sang mga imperyalista nga gahum sa  
pagpanguna sang US ang polisiya  
nga pagpanubo sang lebel sang swel-  
do sang mga mamumugon, pagbuhin  
sa badyet sa serbisyo sosyal kag pag-  
talana sang mas daku nga kapital sa  
monopolyo nga burgesya para kuno  
batuan ang istagnasyon kag impla-  
syon kag pauswagon ang ekonomya.  
Ang penomenon sang istagplasyon  
sadtong dekada 1970 ginbasol nila sa

## **Ang problema sang monopolyo nga kapitalismo sa pagpanu- bo sang lebel sang sweldo kag kita sang mga mamumugon sa mga imperyalista nga pungsod kag sa luwas sini amo ang nagabalik-balik nga krisis sang sobra nga produksyon nga permi mas malala sa nagligad.**

nagataas nga sweldo kag gasto pang-  
katilingban sang gubyerno kag indi  
sa sobra nga akumulasyon sang kapi-  
tal sa kamot sang pila, sa nagadaku  
nga kompetisyon sang mga imperya-  
lista nga gahum kag sa *demand-pull*  
nga implasyon<sup>2</sup> bunga sang sobra nga  
gasto militar.

Nagpirme ang mga imperyalista  
nga gahum sang pangkalibutanon  
nga partehanay sang pagtrabaho  
kon sa diin ginauyatan nila ang  
*high-tech* nga produksyon sang mga  
kagamitan kag iban pa nga daku nga  
produkto (mga armas kag balaklu-  
non pangluho), ginatugutan ang pi-  
la ka pungsod nga maghimo sang  
pila ka sandigan nga produktong in-  
dustriyal kag mga malamanupaktura  
pangkonsumo nga manubo ang du-  
gang nga balor kag ginapaserbi ang  
daku nga mayorya sang mga pung-  
sod bilang tagasuplay sang barato  
nga kusog pangabudlay kag hilaw  
nga materyales.

Ang problema sang monopolyo  
nga kapitalismo sa pagpanubo sang  
lebel sang sweldo kag kita sang mga  
mamumugon sa mga imperyalista  
nga pungsod kag sa luwas sini amo  
ang nagabalik-balik nga krisis sang  
sobra nga produksyon nga permi  
mas malala sa nagligad. Gani ang  
polisiya sang “neoliberal nga globa-  
lisasyon” paliwat-liwat nga nagabu-  
nga sang mas malala nga krisis  
pangpinansya kag pang-ekonomya  
sa paglipas sang mga dekada.

Bisan pa man, ginasisigahum sang  
mga imperyalista nga tagahimo sang  
polisiya nga permi mapangibabawan  
ang mga krisis nga ini paagi sa de-  
regulasyon sang mga balaligyaan  
pangpinansya kag pagsaylo sa pag-  
pangutang. Paagi sa gin-utang nga  
pondo, ginasisigahum nga malampa-

san sang monopolyo nga burgesya  
ang tendensya nga magtibusok nga  
tantos sang tubo; nga malubad sang  
mga estado ang nagataas nga lebel  
sang depisito sa badyet kag nego-  
syo; kag mamentenar sang mga pa-  
milya ang mataas nga lebel sang  
konsumo sa pihak sang pagbuhin  
sang regular nga empleyado kag ki-  
ta. Pero bisan pulu-panahon ang  
pondo nga gin-utang daw nagapa-  
lig-on sa ginatawag hilway nga ba-  
laligyaan kag nakatuga sang ilusyon  
nga nagauswag ang ekonomya, ang  
indi masustenir nga akumulasyon  
sang utang ang magatumba sa ulihi  
sa bilog nga ekonomya.

Ang subong nga malala nga kri-  
sis sa pinansya kag ekonomya na-  
kaugat sa (a) maksimisasyon sang  
ganansya paagi sa sobra-sobra nga  
pagpabarato sa kusog pangabudlay;  
(b) sa akumulasyon lunsay sang ka-  
pital sa produksyon kag pinansya  
nga kapital sa kamot sang mono-  
polyo burgesya sa dalagan sang  
kompetisyon; (k) sa krisis sang so-  
bra nga produksyon nga nagabunga  
sang dugang nga sobrang akumula-  
syon sang kapital; (d) kag sa pagla-  
gas sang monopolyo nga burgesya  
nga lubaron ang tendensya nga mag-  
tibusok ang tantos sang ganansya  
paagi sa pagpuga sang ganansya ha-  
lin sa mga bukal nga kapital kag lun-  
say nga ispekulasyon pangpinansya.  
Ini ang rason sa wala renda nga pag-  
daku sang pautang kag suplay nga  
kwarta, pag-imbento sang *derivatives*  
<sup>3</sup>, halin sa pinansya ang pagpahabok  
sa mga propyedad. Ang pinansyalisa-  
syon sang ekonomya sa kamot sang  
oligarkiya kag sobra nga akumula-  
syon sang kapital sa pinansya para  
kontrolon ini kag gamiton sa ispeku-  
lasyon ang kinaiya sang US.

## **Ginapamilit sang mga mamumugon, pamatan-on, kababainhan, migrante kag iban pa nga pumuluyo ang mga demokratikong kinamatarung kag hustisya sosyal.**

Ang polisiya nga “neoliberal nga globalisasyon” nagpadasig sa konsentrasyon kag sentralisasyon sang kapital sa kamot sang mga imperyalista nga gahum, kon sa diin ginhu-gakom sang US ang 70% sang pangkalibutanon nga kapital. Agud panubon ang lebel sang sweldo sa ekonomya sang US, nagdesisyon ang monopolyo burgesya sang US nga sayluhon ang manupaktura nga pangkonsumo sa mga pungsod kon sa diin barato katama ang kusog pangabudlay pareho sang China kag gamiton ang gin-utang nga pondo para abonohan ang tuman kadako nga depisito sa pagnegosyo sa mayor nga pungsod sa Europe, sa Japan, China kag iban pa. Pero indi basta lang nga pabay-an sang monopolyo nga burgesya sa US nga magtibusok ang regular nga empleyo kag kita sang sahing mamumugon kag nahanunga nga sahi sa US.

Nagpadihut ini sang sunud-sunod nga bukal pangpinansya: ang bukal sang *savings and loans association* sadtong 1986-89, ang bukal nga *high-tech* sadtong 1995-2000 kag ang bukal sa pabalay sining 2002- 2006 agud makapangutang ang sahing mamumugon kag nahanunga nga sahi sang pagbakal sang mga sapi kag pasaluhon sila sa “indi mapaathag nga kabuganaan” kag “pangabuhimanggaranon” kag sa ulihi pagakawatang kag pagakuhaan sila sang propyedad.

Sa kumpas sang US, palareho nga ginsunod sang monopolyo nga burgesya, partikular ang oligarkiya sa pinansya sa tanan nga imperyalista nga pungsod, ang polisiya nga “neoliberal nga globalisasyon.” Gani ang tanan nga imperyalista nga pungsod grabe nga gin-igo sang mabaskog nga krisis kag nagpalapta sang salot sa iban pa nga pungsod

nga may bilateral kag multilateral nga relasyon sa ekonomya kag pinansya sa ila.

Wala untat ang monopolyo nga burgesya sa mapintas nga makasahing pagbato sa proletaryado kag pumuluyo gamit ang mga instrumento sang poder sang estado (kag tanan nga sanga sang gubyrno, labi na ang mga instrumento nga mapiguson) agud tapnaon ang mga unyon kag iban pa nga mga demokratiko nga kinamatarung kag butungon ang sweldo kag kita sang mga mamumugon. Gingamit man sini ang sistema pang-edukasyon, ang masmidya kag iban pa nga pamaagi nga makabuyok agud ilikaw ang sahing mamumugon halin sa muklat kag organisado nga makasahing paghimakas.

Ugaling nag-abot na ang tion sang pagpanukot. Sa pinakamanggaranon kag pinakatuso nga pungsod, naakig gid ang masa sang pumuluyo bangud wala sang gilayon kag naga-kaigo nga tikang para sa temporaryo nga alibyo para sa sahing mamumugon nga nadulaan sang trabaho, ginbawian sang mga balay, nadulaan sang mga pondo pangpensyon nga gindispalko sa 401k<sup>5</sup> kag iban pa nga iskema nga pagpaniplang, nagaantus sang kawad-on ukon kakulangan sang bulig para sa disempleyo, bulig medikal kag iban pa nga benepisyo sosyal. Ang pagpakatig-a sang mga upisyal kag sang oligarkiya sa pinansya sa “neoliberal nga globalisasyon” nagasablag ukon nagapahinay sa pagpatuman sang mga tikang nga Keynesian sa pagtinguha nga pasikaron ang merkado kag produksyon.

Nagalapnag ang diskuntento pangkatilingban kag kinagamo sa tanan nga imperyalista nga pungsod—sa US, European Union, Japan kag Russia. Ginapamilit sang mga mamumugon, pamatan-on, kababa-

inhan, migrante kag iban pa nga pumuluyo ang mga demokratikong kinamatarung kag hustisya sosyal. May polarisasyon sa mga imperyalista nga pungsod samtang ginatuyo sang monopolyo nga burgesya nga ilikaw ang pumuluyo halin sa mga gilayon nga isyu pangkatilingban kag pangpulitika paagi sa mga islogan kag tikang nga sobinista, rasisista, anti-terorista kag nagapanulsol sang gera.

Sa ano pa man, ang subong nga malala kag malawigan nga krisis sa ekonomya nagalatag sang paborable nga kundisyon para sa sahing mamumugon kag bilog nga pumuluyo sa mga imperyalista nga pungsod agud magtukod sang mga progresibo kag rebolusyonaryong partido, organisasyon kag kahublagang masa batuk sa monopolyo kapitalismo kag para sa sosyalismo. Ang malapad nga masa sang pumuluyo dapat mag-alsa sa pang-ekonomya kag pangkatilingban nga kumunoy, mangibabaw sa mapiguson kag agresibo nga mga instrumento sang imperyalista nga estado kag magsakdag sang rebolusyonaryo nga paghiliusa sang tanan nga pungsod.

Daw nagapalayo ang rehimeng Obama sa pinakamalaot nga kinaiya sang “pangkalibutanon nga gera batuk sa terorismo” nga ginpadihot ni Bush. Pero ang US gihapon amo ang numero uno nga pwersa nga nagasakop sa Iraq, Afghanistan kag Palestine, sa interbensyon militar sa Pilipinas kag madamo nga iban pa nga pungsod kag nagamentinar sang ginatos nga mga baseng militar kag abante nga hedkwarters sa bilog nga kalibutan. Kinahanglan maghiliusa ang pumuluyo sa mga imperyalistang pungsod kag iban nga pungsod sa kalibutan kag maghulag batuk sa mga gerang agresyon nga ginalunsar sang US kag iban pa nga imperyalistang gahum.

Samtang nagalala ang krisis pangpinansya kag pang-ekonomya, nagabaskog ang tendensya sa kubay

sang mga imperyalista nga gahum pakadto sa multipolarisasyon kag sa mas mabaskog nga paghimakas sa panibag-o nga pagtulunga sang kalibutan. Wala sang epektibo nga sentro ang mga imperyalista para kasugtan ang pangkabilugan nga mga polisiya sa ekonomya pati ang mga gilayon nga polisiya sa pinansya kag kwarta. Indi pareho sa nagligad, wala sang isa ka pungsod pareho sang US ukon pangpinansya nga institusyon pareho sang IMF ang makahambal nga may bastante nga pondo agud ipautang para sa istabilisasyon. Nakigsugilanon ang US kag IMF sa China, Japan kag iban pa nga pungsod nga nagaprodukto sang langis nga magpain sang mas daku nga pondo, nga daw indi apektado sang krisis ang mga pungsod nga ini.

Anuman nga imperyalista ng estado nga seryoso sa pagpatuhaw sang malig-on nga empleyo ang may tendensya nga magbalay sang kaugalingon sini nga plano para sa liwat nga pagbuhi sang produksyon. Ang rehimeng Obama ginaakusahan na sang proteksyunismo sang iban nga mga imperyalista nga pungsod bangud sa pagtakda sang rekisito nga "Buy America" sa plano nga pagpasikad sa ekonomya kag sa paghatag sang direktang suporta pangpinansya sa mga higante nga tagahimo sang salakyan kag iban pang kumpanya sa manupaktura.

Baliskad sa arogante nga unilateralismo sang rehimeng Bush, ginatum-ukan sang rehimeng Obama ang multilateralismo sa pakigrelasyon sang US sa mga alyado sini kag sa sini ginahimo nga mas epektibo ang mga imperyalista nga pagpasilabot kag gerang agresyon sa idalom sang kumand sang US. Pero ginahitad sang nagalala nga krisis sa ekonomya kag pag-inagaway sa pagakuhan sang enerhiya, mga hilaw nga materyales, mga balaligyaan kag patag sang pamuhunan ang relasyon sang mga imperyalista nga gahum. Nagadaku ang kalain sang buot sa

## **Pero ginahitad sang nagalala nga krisis sa ekonomya kag pag-inagaway sa pagakuhaan sang enerhiya, mga hilaw nga materyales, mga balaligyaan kag patag sang pamuhunan ang relasyon sang mga imperyalista nga gahum.**

---

paggamit sang US sang kusog militar agud agawon ang pinakadaku nga parte sang benepisyo. Nagpa-butyag na sang kalain sa buot sang Russia, France kag Germany sa kahambugan nga *superpower* kag pangkalibutanon nga hegemonismo sang US.

Nagasanting man ang relasyon sang US-China bangud sa mga kontradiksiyon sa ekonomya kag militar. Nagakabalaka ang China nga nagapadihut ang US sang bag-o nga bukal sang "*treasury bond*," nga mahimo sini nga gulpe panubunon ang balor sang mga ini, nga hungod sini ginabuhinan ang ginakuha sini nga eksport sang China kag ginatilawan sini nga buhion liwat ang kaugalingon nga ikasarang sa manupaktura para sa pag-eksport. Labaw nga nagakabalaka ang China nga gusto sang US nga ipabilin ang pangmilitar nga superyoridad sini sa rehiyon Asia-Pacific kag nagapakita ini sang kusog militar kag paghangkat sa rehiyon agud ipabilin ang China nga nakapaidalom sa US.

Sa mga ginatawag nga nagauswag nga merkado, ang China ang pinadaku nga katuwang sang US. Pero bunga sang subong nga krisis sa ekonomya kag pinansya, labi nga nagapangulba ang US sa mga lokal kag dumuluong nga polisiya sang China nga nagainsister sang pungsodnon nga independensya kag kahilwayan, sa pihak sang malawig nga panahon nga pagbuligay US-China sa balayon sang pangkalibutanon nga kapitalismo.

Ang pinakamalala nga gin-igo sang pangkalibutanon nga krisis sa pinansya kag ekonomya amo ang labing daku nga mayorya sang mga pungsod nga nagasalig sa pag-eksport sang hilaw nga materyales kag

permi nagakinahanglan sang dumuluong nga pautang agud pun-an ang ila depisito sa negosyo kag badyet. Nagtibusok subong ang merkado para sa ila mga eksport kag nabudlayan sila mangutang. Kulang ang resorsa sang IMF kag World Bank sa pagpautang. Madugay na nga nalansang ang tanan nga unilateral nga promisa nga pamag-anon ang utang sang pinakaimol nga pungsod kag buhian ang kaimulon kag pauswagon ang mga atrasadong pungsod.

Pila ka dekada na nga nagaantus sang kahalitan pang-ekonomya kag pangkatilingban ang pumuluyo sang Asia, Africa, Latin America kag Eastern Europe sa idalom sang *structural adjustment program*<sup>6</sup> nga ginpanaog sang IMF sa idalom sang polisiya nga "neoliberal nga globalisasyon." Madasig nga nagalala ang ila pang-ekonomya kag pangpulitika nga kahimtangan sa subong nga krisis. Nagabatas sila sang mabaskog nga pag-antus kag ginaduso nga magbato kag maghimakas para sa pungsodnon kag kahilwayan sosyal.

Ang pumuluyo sa mga pungsod nga biktima sang mga imperyalista nga gerang agresyon, pareho sa Iraq kag Afghanistan, ang pinakamainit sa pagpasulong sang armadong pagbato kag pagtuga sang kahalitan sa mga pwersang imperyalista kag papet. Sa subong nga kahimtangan sang krisis nga pangkalibutanon, labi sila nga inspirado nga maghimakas para sa pungsodnon nga kahilwayan.

Labaw sa san-o man ang pagsalig sang tanan sa armadong rebolusyonaryong kahublagan para sa pungsodnon nga kahilwayan kag demokrasya pareho sa Pilipinas, India, Tamil Eelam, Turkey, Palestine, Colombia, Peru kag Nigeria nga magabaskog kag magasulong sila sa tu-

nga sang subong nga pangkalibutanon nga krisis. Ang mga rebolusyonaryong pwersa nga nagasulong sang estratehikong linya sang malawigan nga inaway banwa nagapakita sang maathag nga halimbawa sa pumuluyo sang Southeast Asia, South Asia, Central Asia, Middle East, Latin America kag Africa.

Pat-ud nga magadalom pa kag magadugay ang krisis. Paborable ini para sa pag-uswag sang mga suhetibong pwersa sang rebolusyon paagi sang lain-lain nga porma sang pangmasang panghimakas sa madamo nga pungsod sa tanan nga kontinente. Ang mga upisyal pangseguridad sang mga imperyalistang gahum, labi na

ang direktor sang pungsodnon nga paniktik sang US, nagapahayag na sang pangulba nga mahimo magalala ang subong nga pangkalibutanon nga krisis tubtub sa punto nga makatuga sang kinagamu nga makumparar sa kundisyon sadtong dekada 1920 kag 1930 sa mga imperyalista kag atrasado nga pungsod.

## II. Waskon ang garuk nga nagaharing sistema

**P**irme nga linya nga demagohiko sang papet nga rehimeng Arroyo nga ang armado nga rebolusyonaryong kahublagan ang rason sang pagkaatrasado. Baliskad diri, ang labaw nga mapiguson kag mapanghimulos nga malakolonyal kag malapyudal nga sistema amo ang rason sang pagkaatrasado kag nagatuga sang armado nga pagbato. Ang pagka-mahimuslanon kag mapiguson sang nagahari nga sistema ang ginapalala sang pag-ikog-ikog sang rehimen sa mga imperyalista nga polisiya nga dikta sang US sa patag sang ekonomya, pulitika, militar kag kultura.

Sandig sa polisiya nga “neoliberal nga globalisasyon,” ginaduso sang rehimeng Arroyo ang denasyunalisasyon, liberalisasyon, pribatisasyon kag deregulasyon. Gingamit sini ang lehisasyon kag kasuguan ehekutibo agud kontrahon ang kahilwayan pang-ekonomya kag pungsodnon nga patrimonya, pahanugutan ang wala limitasyon nga pagsulod sang dumuluong nga pamuhunan, tugutan ang dumuluong nga monopolyo nga kontrolon ang mga pangpubliko nga propyedad, mga dunang-manggad kag tanan nga tipo sang negosyo kag si-kuwayon ang tanan nga regulasyon nga daan nagahatag-proteksyon sa interes sang publiko, mga mamumugon, kababainhan, mga bata kag sang kapalibutan.

Sa pagsunod sa polisiya sang

“neoliberal nga globalisasyon,” ginabalabagan sang rehimeng Arroyo ang pungsodnon nga industriyalisasyon kag matuod nga reporma sa duta nga ginainsister sang pumuluyo. Ginahigot sini ang ekonomya sa pag-eksport sang produksyon sang hilaw nga materyales kag malamanupaktura nga manubo ang dugang nga balor. Ginapahanugutan pa sini ang pagtambak sang sobra nga produktong agrikultural, gani nahalitan ang lokal nga produksyon sang pagkaon.

Ginapadalom sang rehimen ang pre-industriyal, agraryo kag malapyudal nga kinaiya sang ekonomya gani permi ini nga nagakadepisito sa badyet kag negosyo kag sa nagapadaku nga panguwa kag lokal nga utang. Bangud ginaputos ini subong sang pangkalibutanon nga krisis sa pinansya kag ekonomya, madasig nga nagalugdang ang ekonomya bunga sang gulpehan nga pagtibusok sang demanda para sa mga eksport sini, sang pagmala sang internasyunal nga pautang, sang paghalalin sang dumuluong nga ispekulatibo nga kapital kag sa pagnubo sang balor sang mga remitans sang mga kontraktwal nga mamumugon sa luwas sang pungsod.

Labaw nga nagaantos ang malapad nga masa sang pumuluyo sa pagtibusok sang produksyon kag paghapaon sang ekonomya. Madasig nga nagtaas ang tantos sang

disempleyo. Nagatibusok ang kita sang basehang masa kag sang nahanunga nga saray sang katilingban. Nagapatimbuok ang presyo sang mga basehan nga balaklunon kag nagalain ang mga serbisyo sosyal.

Gani nagatindog ang pumuluyo agud magprotesta kag pakamalauton ang pagkapapet kag korapsyon sang rehimen kag ipakigbato ang polisiya kag tikang nga magalubad sa krisis kag liwat magabuhi sang ekonomya, magapaluntad sang mga trabaho kag disente nga sweldo, pat-uron ang pangabuhian para sa tanan nga pamilya sang manubo kag nahanunga nga sahi kag siguruhon ang bastante nga produksyon sang pagkaon.

Labaw sa san-o man nangin mapintas ang rehimen sa pag-atubang sini sa demokratiko nga kahublagan masa sang mga anakbalhas nga mamumugon kag mangunguma kag nahanunga nga saray sang katilingban. Ginapasingki sini ang mga atake sang militar kag pulis sa mga komunidad sa ngalan sang “*counterinsurgency*” agud palayason ang pumuluyo kag agawon ang duta para panginpuslan sang mga korporasyong agrikultural, mga kumpanya sa pagmina, pagtroso kag iban pa. Nagahimo ini sang mga ekstrahudisyal nga pagpatay, pagdukot kag pagtorturyur sang mga indi armadong aktibista pati man ang iban nga sibilyan nga

malapit nga kadugo ukon abyan sang mga ginasuspetsahan nga rebolusyonaryo. Ginasamaran sila nga mga “kaaway sang estado” kag ginahimo nga target sang pinakamalala nga paglapas sa tawhanong-kinamatarung.

Ang kahambugan kag brutalidad sang rehimen suportado sang nagadaku nga presensya kag interbensyon militar sang US sa Pilipinas. Ang imperyalismong US ang nagasulsol sang lapnagon kag sistematiko nga paglapas sa tawhanong-kinamatarung paagi sang US-RP Mutual Defense Board, Joint US Military Advisory Group, mga ahente sang Central Intelligence Agency (CIA) kag Defense Intelligence Agency (DIA) kag ila mga Pilipino nga *asset* sa *intelligence* kag ang mga papet nga burukrata kag upisyal pangseguridad nga nagpaidalom sa indoktrinasyon kag paghanas sang US.

Ginsundan sang bag-o nga hepe sang imperyalismong US nga si Obama ang agi ni Bush sa pagsuporta sa brutal nga polisiya militar sang rehimen Arroyo sa rason nga ini kontra-terorismo. Gani padayon nga nagadamgo nga bugtaw ang rehimen nga maguba ukon mapaluya sini lunsay ang ligal nga demokratikong kahublagan kag ang armado nga rebolusyonaryo nga kahublagan sang pumuluyo antes ang tunga-tunga sang 2010. Nakakuha ini sang kaisog sang buot sa mga bangian nga kasugtanan sa US pareho sang US-RP Military Assistance Agreement, Mutual Defense Pact kag Visiting Forces Agreement.

Nagapabungol-bungol ini sa nagabaskog nga singgit sang pumuluyo nga ibasura ang Visiting Forces Agreement nga nagalapak sa pungsodnon nga kahilwayan kag teritoryal nga integridad sang Pilipinas kag nagaserbi nga lisensya para sa US nga magdeploy sang mga pwersa militar sa diin man sa Pilipinas anuman kadugay, nga la-

**Muklat nga polisiya sang rehimen Arroyo nga pabay-an ang AFP, ang PNP kag iban pa nga pwersa paramilitar nga wala pili nga lapakon ang mga tawhanong-kinamatarung agud pahugon ang pumuluyo kag mga pwersa nga oposisyon kag samaron ang ila buot sa pagbuyagyag kag pagbato sa mga buhat sang pagpakapapet, korapsyon kag brutalidad.**

pas sa konstitusyon nga 1987 nga nagadumili sa mga dumuluong nga tropang militar kag mga nukleyar.

Bug-os ang rason sang pumuluyong Pilipino nga magsulong sang armadong rebolusyon para sa pungsodnon nga kahilwayan kag demokrasya batuk sa imperyalismo nga US kag mga lokal nga nagapanghimulos nga sahing daku nga kumprador kag agalon nga mayduta. Ang papet nga rehimen Arroyo nagasalimuang sa paggamit sang pwersa militar agud tapnaon ang inaway banwa kag ang ligal nga demokratikong kahublagan protesta. Nagdesisyon ini nga ipatuman ang ginatawag nga Internal Security Operation Bantay Laya kag isabotahang sugilanon pangkalinungan nga GRP-NDFP sa pagbansag nga terorista ukon ordinaryo nga kriminal ang mga pwersa kag tiglawas kag konsultant sang NDFP kag pagbalabag sa pormal nga pagsugilanon kag pagpatuman sang mga kasugtanan bilateral.

Indi man mapauntat ang rehimen sa paggamit sang pwersa militar agud tapnaon ang rebolusyonaryo nga kahublagan sang pumuluyong Moro para sa kaugalingon nga determinasyon kag ila duta sang katigulangan. Kaangot sini, gintunga sang reaksiyunaryo nga armadong kusog ang pwersa sini, katunga ang gindeploy sa kadutaan sang Moro kag mas manipis pa nga ginlapta ang katunga sa mas madamo nga bahin sang kapuluan sang Pilipinas batuk sa Bag-ong Hangaway sang Banwa. Bangud nahimo sila nga bulag kag bungol sang pumuluyo, ginasaylu-saylo sang prubinsya ang mga batalyon

sang kaaway nga masami wala sang rason ukon bilang padasu-daso nga reaksiyon sa mga taktikal nga open-siba sang BHB.

Samtang nagalala ang krisis pang-ekonomya kag pangkatilingban, nagalala man ang pangpulitika nga krisis sang nagahari nga sistema. Nagagamay pa gid ang mga benepisyo nga matulunga sang nagakumpetisyon nga mga paksyon sang mapanghimulos nga mga sahi. Tendensya sang mga ara sa poder nga solohon ang nakurakot sa kaban sang banwa kag pahugon ang ila mga karibal sa pulitika. Gani labi nga nagasingki kag nangin mapait kag mapintas ang kontradiksiyon sa kubay sang mga reaksiyunaryo.

Samad na gid kag nahamulag ang rehimen bangud sa pagkabayagyag sang tuman kadamo nga malubha nga kaso sang korapsyon. Sa kamatuoran, ginalista na ini bilang pinakakorap nga rehimen sa Asia kag isa sa pinakakorap sa bilog nga kalibutan. Lakip sa korapsyon sang rehimen ang pagpanuhol sa mga upisyal sang Comelec para dugangan ang boto ni Arroyo kag mga kahimbon sini sadtong eleksyon 2004 kag 2007, ang pagtulu nga sa tanan nga mayor nga kontrata sa negosyo nga gin-aprubahan sang mga upisyal sang guberno, ang sobra nga pagpresyo sa mga ginabakal sang guberno kag mga proyekto pang-imprastruktura, ang sala nga paggamit sang mga garantiya ng guberno sa pautang kag ang pagkurakot sa mga pondo nga pangbayad danyos sa mga biktima sang paglapas sa tawhanong-kinamatarung sadtong panahon

sang pasistang diktaduryang Marcos.

Muklat nga polisiya sang rehimeng Arroyo nga pabay-an ang AFP, ang PNP kag iban pa nga pwersa paramilitar nga wala pili nga lapakon ang mga tawhanong-kinamatarung agud pahugon ang pumuluyo kag mga pwersa nga oposisyon kag samaron ang ila buot sa pagbuyagyang kag pagbato sa mga buhat sang pagpakapapet, korapsyon kag brutalidad sang rehimen. Dugang pa, wala kataka sini nga ginatuyo nga iduso ang pagbag-o sa konstitusyon nga 1987 agud hatagan-dalan ang pagpabilin sa poder sang paltik nga presidente bilang puno nga ministro pagkatapos sang 2010 lakip man agud bag-uhon ukon panason ang pila ka probisyon sa konstitusyon bahin sa pagpangapin sa tawhanong-kinamatarung kag sa paglimita sa pagdeklarar sang layi militar, sa kahalwayan pang-ekonomya kag pagpangapin sa pungsodnon nga patrimonya kag sa pagdumili sa mga dumuluong nga baseng militar kag mga armas sang madamuan nga pagpanamad sa teritoryo sang Pilipinas.

Wala gid nahadlok sa rehimen ang malapad nga masa sang pumuluyo kag ang malapad nga kubay sang mga pwersa nga oposisyon. Akig katama sila sa mga polisiya nga anti-nasyunal kag anti-demokratiko sini. Gani isa ka malapad nga alyansa sang mga pwersa nga oposisyon ang natukod agud pamatukan ang rehimen kag pataksikon ini. Agud batuan ang alyansa nga ini, ginagamit sang rehimen ang tanan nga mahigko nga taktika, lakip ang wala mandamyento nga paghalughog kag pagdakop sa mga tawo kag kumpiska sa mga propyedad, pagbungkag sa mga aksyong masa kag pagdukot, pagtortur kag pagpatay sa mga aktibista nga oposisyon. Ang mga patriyotiko kag progresibong pwersa ang pangunahon ginaigo sang mga pasis-

ta nga atake.

Bangud tubtub subong napasalawan sa pagtinguha nga bag-uhon ang konstitusyon, ginatuyo sang rehimeng Arroyo nga ikonsolida ang alyansa sang pinakareaksyunaryo kag pinakakorap nga paksyon sa pulitika, pareho sang KAMPI kag Lakas-NUCD sang rehimen kag ang Nationalist People's Coalition ni Eduardo Cojuangco kag padalagnon si Sec. Gilbert Teodoro sang Department of National Defense bilang kandidato sini pangpresidente sa eleksyon 2010. Nagalaum ang mga paksyon nga ini nga mangibabaw sa eleksyon 2010 paagi sa ila gahum kag kwarta kag sa kuno kapaslawan sang oposisyon nga maghiliusa sa isa ka kandidato sa pagkapangulo.

Ang kontradiksyon sa kubay sang mga pangpulitika nga paksyon sang daku nga kumprador kag agalon nga mayduta nasalaming sa pwersa militar kag pulis sang reaksyunaryong estado. Una sa tanan ara sa nagahari nga reaksyunaryong hubon ang inisyatiba para gamiton ang kadena sang kumand sa militar kag pulis batuk sa ila mga karibal sini sa pulitika. Ginapadyaan sini ang mga tampad nga sumulunod sa kubay sang militar kag pulis sa mga promosyon kag mapuslanon nga misyon nga nagalakip sa pagpangawat sang mga pondo pangpubliko kag pagsosyo sa mga sindikato kriminal.

Bisan pa man, may mga upisyal kag suldado sa armado nga serbisyo nga nagabalibad sa mga kriminal nga mandu sang nagaharing hubon kag nagatukod sang mga grupo ukon kahublagan nga nagahandum sa minimum sang malimpyo kag tampad nga gubyrno kag sa maksimum, sang pungsodnon kag pangkatilingban nga paghilway sang pumuluyo halin sa dumuluong kag pyudal nga pagginahum. May pila ka upisyal nga ang simple nga katuyuan nga paayuhon ang su-

bong nga porma sang gubyrno samtang ang iban gusto magpartisipar ukon makigbuligay sa rebolusyonaryo nga kahublagan.

Isa ka madasig nga paagi sang paggamit sang makatarungan kag malawigan nga kalinungan sa pungsod amo ang pagsikway sang mga patriyotiko kag progresibong upisyal kag suldado sang reaksyunaryo nga armadong pwersa sa maluibon nga nagahari nga hubon kag pagsuporta sa gubyrnong transisyon sang kadam-an bug-uson sang mga lider sibilyan nga patriyotiko kag progresibo kag handa nga padasigon ang pagkignegosasyon para sa makatarungan nga kalinungan sa NDFP.

Ang mga rebolusyonaryo nga pwersa kag pumuluyo nga ginapamunuan sang PKP bukas gid nga magpasakop sa isa ka malapad nga demokratikong alyansa ukon kahublagan lakip na sa isa ka gubyrno nga koalisyon nga nagatib-ong sa pungsodnon nga independensya kag kahalwayan, nagatigayon sang pungsodnon nga industriyalisasyon kag reporma sa duta, pagtib-ong sang patriyotiko, siyentipiko kag demokratiko nga kultura kag nagapatuman sang polisiya pangluwas nga nagasulong sang kalinungan kag kauswagan.

Amo na lang kalubha ang sosyo-ekonomiko kag pangpulitika nga krisis gani makapat-ud ang armado nga rebolusyonaryong kahublagan nga ang kundisyon paborable sa pagbaskog kag pagsulong sini amo man para sa pag-uswag sang konsepto kag mapatuman ang demokratiko nga gubyrnong koalisyon. Kon ang pinakareaksyunaryo nga mga pwersa ang magdaog sa pagtukod sang masunod nga rehimen, magasulong nga wala sang kaparis ang inaway banwa sa Pilipinas. Kon ang oposisyon naman ang magmadinalag-on, magasingki man ang inaway banwa kon luiban sang bag-o nga nagaharing hubon ang pumuluyo.



### III. Mga natipon kag subong nga kadalag-an sang BHB

Sang nagligad nga 40 tuig nga pagluntad sini, ang Bag-ong Hangaway sang Banwa nagasunod sa pagpamuno sang Partido kag madalom nga nag-ugat sa kubay sang pumuluyo. Nakatipon ini sang kusog kag mang-garanon nga inagihan kag nag-agum ini sang dungganon kag isganon nga kadalag-an sa pagsulong sang bag-ong demokratiko nga rebolusyon paagi sa malawigan nga inaway banwa batuk sa imperyalismo nga US kag mga lokal nga mapanghimulos nga sahi sang daku nga kumprador kag agalon nga mayduta.

Sadtong 1992, ginlunsar sang mga proletaryo nga rebolusyonaryong kadre kag mga Pulang kumander kag hangaway ang Ikaduha nga Dungganon nga Kahublagan sa Pagpanadlong (IDKP) para tumuron kag tadlungon ang daku nga kasaypanan kag malig-on sila nga nagpanindugan kontra sa suhetibismo kag “Wala” kag Tuo nga oportunismo sadtong daku nga bahin sang dekada 1980 tubtub temprano nga bahin sang dekada 1990. Nag-agum sila sang dalagku nga kadalag-an sa pagsaway, pagsikway kag pagtadlong sa mga kasaypanan sa ideolohiya, pulitika kag organisasyon. Nakonsolida kag may panibag-o nga kapagsik ang Partido kag BHB kag gilayon nakalunsar sang panibag-o nga pagbalod sang rebolusyon sa lain-lain nga aspeto sang hilikuton.

Ang nanging pinakamalala nga suhetibista nga kasaypanan amo ang panan-awan nga indi na malapyudal ang ekonomya sang Pilipinas kundi industriyal-kapitalista na, nga indi direkta nagapalig-on sa ginahambal sang pasista nga diktaduryang Marcos nga ginpauswag sini ang ekonomya. Hayagan nga ginsakdag sang mga Wala nga oportunista ang amo nga panan-awan kag gintuyo nila nga kuhaon ang pagpamuno sang sahing mamumugon sa nagahiliugyong prente para kuno himuon ini nga mas mabaton sa pumuluyo sa idalom sang pagpamuno nga burges. Masyado man nga ginpadaku sang mga “Wala” nga oportunista ang

lebel sang industriyalisasyon kag urbanisasyon sa Pilipinas para hatagan-rason ang mga pag-alsa sa syudad bilang pangunahon nga paktor sa rebolusyon kag sikwayon ang estratehikong linya sang malawigan nga inaway banwa nga nakabase sa kaumhan.

Bunga sang konsolidasyon sa ideolohiya, pulitika kag organisasyon, natapna sang Partido kag BHB ang pag-atras kag paglala sang rebolusyonaryo nga kahublagan, partikular ang grabe nga paggamay sang baseng masa nga nanging lutaw sadtong ulihi nga katunga sang dekada 1980. Sadtong 1998-99 sang gindeklara ang pagtapos sang IDKP, ang Partido kag ang bilog nga rebolusyonaryo nga kahublagan nagmarka sang signipikante nga pagdaku kag mga pagsulong. Nagdoble ang katapuan sang Partido sadtong madason nga apat ka tuig. Kadam-an sang pagdaku nga ini natabo sa mga prenteng gerilya (sa mga yunit sang BHB kag mga lokal nga sanga sang Partido). Kadam-an narekrut sa kaumhan. Nagdamo man ang mga rekrut sa kasyudaran.

Nadugangan sang sobra 15% ang armadong kusog sang linibo nga hangaway sang BHB. Bunga sang dugang pa nga madinalag-on nga taktikal nga opensiba, nagdaku sang 33% ang isip sang armas nga nakumpiska sa mga pwersa sang kaaway. Nagdaku pakadto 9,000 (21% sang kabilugan nga isip sa pungsod) ang isip sang mga barangay nga ginahulagan

sang BHB. Nagalab-ot sa 128 ang isip sang mga prenteng gerilya. Tatlo ka pilo ang baseng masa kag ginalakipan ini sang minilyon katawo sa masobra katunga sang mga banwa kag syudad sa pungsod (800 sa kabilugan nga 1,500).

Nalabawan na subong sang BHB ang kadakuon kag sakop sang tanan nga nauna nga rebolusyonaryo nga hangaway sa kasaysayan sang Pilipinas. Indi hamak nga tanan-nga bahin ini nga mas mabaskog sangsa sadtong dekada 1980 baliskad sa ginapanghambal sang reaksyunaryo nga hangaway kag mga traidor. Nagaangkon ini sang kumprehensibo nga malapad nga suporta. Napanday ini pareho sang salsalon sa madamo nga inaway kag may nagakaigo nga kusog para magdulot sang makamamatay nga bunal sa kaaway sa bilog nga pungsod paagi sa mga taktikal nga opensiba nga malip-ot lang ang pagpahuway.

Sa pila ka tuig na nga nagligad, naglatag ang Komite Sentral sang Partido sang programa para kumpletuhon ang temprano nga halintang sang estratehiko nga dependsiba kag pakadto sa tunga-tunga nga halintang. Ang pangunahon nga kinaiya sang halintang nga ini amo ang horisontal nga pagpundar sang Partido, hangaway sang banwa kag rebolusyonaryo nga kahublagan masa. Wala untat nga ginapalapad kag ginapadalom ang rebolusyonaryo nga baseng masa. Kaangut sini, ginatukod ang hangaway sang banwa pakadto sa kusog-kumpanya sa kada prenteng gerilya nga may platun bilang sentro de grabidad sa sakop nga isa ka distrito nga may isa ka platun sa kada munisipalidad.

Kadungan sini, ginatukod ang

mga organo sang gahum pangpulitika sa lebel barangay, munisipalidad kag distrito sa mga konsolidado nga lugar. Ginaasikaso ang lainlain nga tipo sang hilikuton sa mga mayor nga banwa para pukawon, organisahon kag pahulagon ang masa sa kaumhan kag kasyudaran. Nagatukod sang mga alyansa sa mga lokalidad kag sa mataas nga mga lebel. Yabi sa tanan nga ini ang lubos kag malaparan nga pagpabaskog kag pagkonsolida sa Partido, hangaway sang banwa, mga organo sang gahum pangpulitika kag mga rebolusyonaryo nga organisasyong masa.

Sadtong una nga tuig sang implementasyon sang programa, ang Partido ang nagrehistro sang madasig nga pagdaku. Apang pagkataspos naghinay ini. Katunga lamang sang target sa rekrutment ang nalabot. Tuman ka importante nga masabat ang mga rekisito sa pagpadaku, paghanas kag pagpauswag sa kwerpo sang mga kadre kag katapo sang Partido, hangaway sang banwa kag mga organisasyong masa para mapalapad kag makonsolidasila.

Sa kabilugan, mapagsik ang rekrutment sang mga Pulang hangaway. Sige-sige nga nagadaku ang hangaway sang banwa kag mataas ang moral sini sa pagpakig-away. Mahimo nga magdulot sang temporaryo nga kabudlayan ang konsentrado nga atake sang kaaway sa pila ka lugar. Apang ang mga kahayupan nga ginahimo sang mga pwersa sang kaaway nagapaakig sa pumuluyo kag nagaduso sa mga mangunguma kag aktibista nga ginalagas nga mag-entra sa hangaway sang banwa. Sandigan nga kahinaan sang AFP, PNP kag mga pwersa nga paramilitar ang mangin mapintas nga instrumento sang imperyalismo nga US kag mga lokal nga mapanghimulos nga sahi.

Bilang reaksiyon sa pagbaskog

## **Apang ang mga kahayupan nga ginahimo sang mga pwersa sang kaaway nagapaakig sa pumuluyo kag nagaduso sa mga mangunguma kag aktibista nga ginalagas nga mag-entra sa hangaway sang banwa.**

sang armado nga rebolusyonaryong kahublagan, ginalatag sang papet nga rehimeng Arroyo ang ginatawag nga Internal Security Operation Plan Bantay Laya sadtong 2001 sa katuyuan nga waskon ang BHB. Apang nabuyagyag ang lubos nga kapaslawan sang OBL sadtong ikaduha nga bahin sang 2005 sang maghimo ang BHB sang mga taktikal nga opensiba sa bilog nga pungsod. Sa pangsulod nga pagtasa sini sadtong 2006, ginako sang AFP *general staff* ang kapaslawan sang OBL.

Apang ginasekreto sang rehimen ang nasambit nga pagtasa kag labi pa ini nga nangin desperado sa handum nga waskon ukon estratehiko nga lutuson ang BHB. Gani liwat ginpatuman ang napaslawan nga plano kag gintawag ini nga Enhanced Internal Security Plan para makalunsar sang kontra-rebolusyonaryo nga kampanya nga mas mabangis kag mapintas sangsa OBL1. Ang tuman nga ginkalain sang OBL2 sa pagpanamad sa mga ginasuspetsahan nga aktibista bilang mga “kaaway sang estado” agud himuon sila nga target antes dukuton, tortyuron kag patyon sang mga *death squad* kag sa ulihi ipalapnag sang mga propagandista militar nga ang mga biktima “ginpurga” sang PKP kag BHB sa pihak sang mga testimonya sang mga katrabaho, pamilya kag abyan sang mga biktima.

Ginsabat sang Partido ang nagadugang nga mga atake sang kaaway sa mga komunidad kag aktibista paagi sa panawagan para sa todo-todo nga paghimakas para patalsikon ang rehimen, pasingkion ang mga operasyong gerilya kag isulong ang tanan nga porma

sang paghimakas para sa pungsudnon nga kahilwayan kag demokrasya. Amo na lang kabaraghal kag sistematiko ang mga paglapas sang mga pwersa sang kaaway sa tawhanong-kinamatarung gani nakuha ang atensyon sang mga internasyunal nga organisasyon sa tawhanong-kinamatarung kag mga organisasyon nga relihiyoso, pila ka gubyerno kag sang Human Rights Commission kag mga espesyal nga reporter sang UN kag naghimo sila sang mga pagpanayasat kag ginapasabat nila ang gubyerno sa Pilipinas. Tubtob subong, ginatabunan sang rehimen ang mga krimen sang mga armado nga kamposini.

Sa estratehiko nga punto de bista, ang balanse sang kusog sa tunga sang AFP kag BHB ara sa 10:1. Apang sa panahon sang estratehikong depensiba, nakalunsar ang BHB sang mga taktikal nga opensiba kontra sa AFP sa timbangan nga 10:1. Likom sa kaaway kon san-o kag diin magalunsar ang BHB sang mga taktikal nga opensiba kontra sa mga yunit sang kaaway nga masarangan sini nga lutuson. Sa pagpasingki sini sang pagpakig-away sa MILF sa Mindanao, ginsaylo sang AFP ang katunga sang mga pwersa sini sa kadutaan sang Moro, gani tuman nga nabuhinan ang mga tropa sang AFP kontra sa BHB.

Antes pa man ini, masyado na kahitad kag manipis ang latag sang AFP kontra sa BHB. Indi sini masarangan magsakop sang masobra 10% sang teritoryo nga 128 prenteng gerilya. Sa kada natalana nga panahon, makasakop lamang ini sang 300 sa kabilugan nga 42,000 barangay sa bilog nga pungsod. Bi-

**Samtang ginakonsentra sang AFP ang mga pwersa sini sa pila ka limitado nga lugar sa kada natalana nga panahon, ginakuha naman sang BHB ang lubos nga inisyatiba sa paglunsar sang mga taktikal nga opensiba lakip ang mga reyd, ambus, sabotahe, isnayp kag pagpang-aresto.**

---

san sa mga prayoridad nga target nga prenteng gerilya sang OBL, 12 barangay lang sa kada prenteng gerilya ang masarangan sakupon sang AFP sa sulod sang tatlo tubtob anom ka bulan.

Tanan nga magagmay nga yunit sang AFP, PNP kag mga pwersa nga paramilitar bulnerable sa mga taktikal nga opensiba sang BHB sa 90% sang teritoryo sang mga prenteng gerilya kag mga kaiping nga lugar. Sa kamatuoran, san-o man gustuhon makahulag ang BHB sa masobra 90% sang Pilipinas. Samtang ginakonsentra sang AFP ang mga pwersa sini sa pila ka limitado nga lugar sa kada natalana nga panahon, ginakuha naman sang BHB ang lubos nga inisyatiba sa paglunsar sang mga taktikal nga opensiba lakip ang mga reyd, ambus, sabotahe, isnayp kag pagpang-aresto. Ginahatagan prayoridad sang BHB ang pag-agaw sang mga armas santo sa katuyuan nga padamuon ang mga Pulang hangaway kag mga yunit sang BHB.

Nagadugo ang kaaway sa linibo nga pilas nga dulot sang nagadamo nga bunal sang BHB. Manubo ang moral sang mga upisyal kag suldado sang AFP kag PNP. Nagakalutos sila sa nagadamo nga taktikal nga opensiba sang BHB. Akig ang mga ordinaryo nga suldado sa ila nga mga upisyal bangud sa pagdaya sa ila rasyon kag alawans kag pagpadala sa ila nga mga bulag kag makatalagam nga pagpatrulya ukon paghimo sang tuma kadamo nga kasaypanan sa operasyon.

Ang kaakig nga dulot sang masunson nga pagkalutos, kapaslawan kag desperasyon mga paktor sa tendensya sang mga upisyal kag

suldado sang AFP nga maghimo sang lapnagon nga mga paglapas sa tawhanong-kinamatarung para pahugon ang mga tawo kag pugaon sang impormasyon. Nagaimbento man sila sang mga armado nga engkwentro sa BHB para makakuha sang merito sa inaway ukon ireport ang pagkadula sang armas kag bala nga ginabaligya nila para madugangan ang gamay nila nga sweldo.

Lubos man ang pagkawala'y huya sang mismo nga rehimen kag bilog nga kadena sang kumand sang AFP sa pag-imbento sang mga kadalagan sa pagpabugal nga nakapatay sila sang amo kadamo nga hangaway sang BHB, nakaagaw sang amo kadamo nga kampo sang BHB kag nakaguba sang amo kadamo nga prenteng gerilya. Baliskad sa mga ini, wala sila sang naguba ni isa ka prenteng gerilya. Bilog ang tanan nga 128 prenteng gerilya kag nagaserbi nga pundasyon para sa pagtukod sang 42 dugang nga prenteng gerilya para masakop ang kada isa sa 170 rural nga distrito nga kongresyunal.

Wala sang huya man nga ginasulit sang rehimen kag AFP ang kabutigan nga waskon ukon pahinaon nila ang BHB antes magtungatunga ang 2010. Subong pa lang, dapat na sila nga mag-ako sang kapaslawan. Akuon man nila ini ukon indi, ipakita sang BHB ang pagluntad sang tanan nga prenteng gerilya paagi sa paliwat-liwat nga opensiba sa kada prenteng gerilya bag-o ang 2010.

Labi pa nga naguba ang OBL2 bangud sa pagtukod sang mga tsekpoynt sa kasyudaran, pagpakat sang tropa sa dalagku nga unibersidad kag sa may 27 komunidad sa

syudad kag sa paghimo sang mga ginatawag nga *saturation drive* sa napaslawan nga pagtinguha nga kugmaton ang mga mamumugon, imol nga tagasyudad, pamatan-on kag kababainhan kag lupigon ang kahublagan pungsudnon-demokratiko sa kasyudaran. Naakig ang malapad nga masa sang pumuluyo kag labi nga nangin determinado nga magbato kag mag-away.

Ang lubos nga kapaslawan sang OBL nagapamatuod nga ang bagong demokratiko nga rebolusyon paagi sa malawigan nga inaway banwa ang dalan para maagum sang pumuluyo nga Pilipino ang pungsodnon kag pangkatilingban nga paghilway sa mga nagapamigos kag nagahimulos sa ila. Sa dalagan sang inaway banwa, ang BHB ang nangin maayo nga pwersa pang-away, pangpropaganda, pangorganisa, pangproduksyon kag pangkultura. Natingub sini ang rebolusyonaryo nga armado nga paghimakas, tunay nga reporma sa duta kag pagtukod sang baseng masa. Nasulong sini ang antipyudal nga nagahiliugyong prente sa balayon sang pungsudnon nga nagahiliugyong prente.

Wala napirde kag sige-sige nga nagabaskog ang BHB bangud nagasunod ini sa husto nga pagpamuno sang Partido kag ginaagum sini ang indi maubos nga suporta sang pumuluyo. Ini ang instrumento sang pumuluyo sa pagtigayon sang rebolusyong agraryo bilang pangunahon nga sangkap sang demokratiko nga rebolusyon. Ginahimo sini ang reporma sa duta halin sa lebel sang minimum nga programa (pagpanubo sang arkila sa duta, pagdula sa usura, pagpataas sang suhol sang mamumugon sa uma, pagpaayo sang presyo sang mga produkto sa uma kag pagpataas sang produksyon paagi sa pagbinuligay kag panugod nga kooperasyon) pakadto sa lebel sang maksimum nga programa

sang pagkumpiska sang duta halin sa mga agalon nga mayduta kag libre nga pagpanagtag sini sa mga nagatalauma.

Ang BHB ang nagapanguna nga instrumento sa pagtukod sang mga organisasyong masa sang mangunguma, mamumugon sa uma, kababainhan, pamatan-on, aktibista nga pangkultura kag iban pa nga pumuluyo kag sa pagtukod sang mga organo sang gahum pangpulitika halin sa lebel sang ginanombrar nga komite nga pang-organisa sang baryo pakadto sa ginaboto nga komite nga rebolusyonaryo

sang baryo. Ginasiguro sang mga organo sang gahum pangpulitika kag mga organisasyong masa ang hugot nga angot sang BHB kag pumuluyo. Nagahimo sila sang mga kampanyang masa sa edukasyong publiko, ikaayong lawas kag katinlo, produksyon, treyning sa pagpangapin sa kaugalingon, paglubad sang mga problema kag pagpauswag sang kultura.

Ang armado nga rebolusyonaryo nga kahublagan nagakuha sang kusog sa pumuluyo indi lang sa kaumhan kundi pati sa kasyudaran. Ginakoordinar sang Partido

ang mga paghimakas masa lunsay sa kasyudaran kag kaumhan kag nagatalana ini sang mga kadre kag aktibista halin sa sahi nga mamumugon kag nakaeskwela nga pamatan-on para maghulag sa hangaway sang banwa kag sa kaumhan. Ang padayon nga koordinasyon sang mga masa sa kasyudaran kag kaumhan nagahanda sang dalan para sa pagtukod sang patriyotiko kag progresibo nga gubyrno nga koalisyon ukon para sa rebolusyonaryo nga pag-agaw sa gahum pangpulitika sa mga syudad sa bilog nga pungsod.

## IV. Isulong ang inaway banwa

**S**a maabot nga tuig, dapat naton padayon nga saulogon ang ika-40 anniversary sang pagkatukod sang Bag-ong Hangaway sang Banwa paagi sa pagpasingki sang inaway banwa sa pagpasulong sini padulong sa bag-o kag mas mataas nga lebel kag sa sini mapasulong ang demokratikong rebolusyon sang banwa batuk sa imperyalismo nga US kag mga lokal nga mapanghimulos nga sahi daku nga kumprador kag agalon nga mayduta.

Sa katuyuan nga ini, nagapanawagan ang Komite Sentral sang Partido Komunista sang Pilipinas sa mga Pulang kumander kag hangaway, sa mga kadre kag katapu sang Partido sa hangaway sang banwa, mga teritoryal nga organisasyon sang Partido, mga organo sang gahum pampulitika kag mga organisasyong masa masa kag sa malapad nga pumuluyo nga himuon ang lubos nga ikasarang para ipatuman ukon magbulig sa pagpatuman sa masunod nga pang-away nga hilikuton:

**1. Pasingkion ang inaway gerilya base sa nagapalapad kag nagapadalom nga baseng masa.** Mentenaron ang inisyatiba sa paglunsar sang mga taktikal nga opensiba batuk sa mga yunit sang kaaway, AFP man ukon PNP, mga pwersa paramilitar kag mga pribado nga armadong grupo sang mga mapanglupig kag mapanghimulos, maglunsar lang sang inaway nga sigurado

nga madaog. Gamiton ang elemento sang sorpresa kag magkonsentra sang mabaskog nga pwersa batuk sa mas maluya nga yunit sang kaaway.

Hatagan sang prayoridad ang mga taktikal nga opensiba nga magaspas sa mga yunit sang kaaway kag makakumpiska sang mga armas. Kinahanglan naton ang mas madamo nga armas para padamuon ang mga yunit sang BHB kag mga prenteng gerilya. Waskon ang mga talaguan sang langis, salakyan kag iban pa nga kagamitan kag pasilidad sang kaaway. Bulabugon ang hulag sang kaaway kag atakehon ang linya sang suplay. Harason ang mga detatsment ukon hedkwarters sang kaaway para labi pa nga mademoralisa ang tropa sang kaaway, hatagan sang kahalitan ukon pan-an para maambus ang magaayuda nga yunit.

Ang mga tipo nga opensiba ginalakipan sang mga ambus, reyd, operasyon pang-aresto, pagpanabotahe kag isnayping. Pleksible nga gamiton

ang mga taktika sang gera nga mahulag. Sandig sa katuyuan kag mga kahimtangan, gamiton ang taktika sang konsentrasyon sa pag-atake sa mga yunit sang kaaway, ang pagsaylu-saylo para maglikaw sa bira sang kaaway kag pagdispers para sa hilikuton pangmasa kag propaganda.

**2. Tigayunon ang pulitiko-militar nga edukasyon kag paghanas sa mga Pulang hangaway kag kumander.** Pangibabawon ang pulitika. Sakop sini ang pamumuno sang Partido sa hangaway sang banwa, ang pagpalapnag sang pangkabilugan nga linya sang demokratikong rebolusyon sang banwa kag ang pagsunod sa linya pangmasa sang pagtuon halin sa masa, pagsalig kag pagsandig sa ila. Dapat ilunsar ang pulitiko-militar nga edukasyon kag paghanas sa mga eskwelahan nga gin-organisa sang Partido lakip sa kada yunit sang BHB sandig sa mga pagsulundan sang Partido.

Ang katuyuan sang pulitiko-militar nga edukasyon kag paghanas amo ang pagpataas sang rebolusyonaryo nga kaalaman kag kahanasan militar sang mga Pulang hangaway kag kumander kag magpauswag sang mga kadre sang Partido kag Pulang kumander sang BHB sa lain-lain nga lebel. Dapat man hatagan sang Partido kag BHB sang mga ginpasimple

## **Ang hangaway sang banwa pwede maghimo sang mga tikang para kuhaan sang ikasarang ang daku kag despotiko nga agalon nga mayduta nga padalaganon ang ila negosyo kag pwersahon sila nga maghalin kag abandonahon ang duta.**

nga pulitiko-militar nga edukasyon kag paghanas ang milisya sang pumuluyo kag mga yunit pangdependa sang mga organisasyong masa.

**3. Tukuron ang mga yunit sang BHB suno sa plano nga padamuon ang mga prenteng gerilya.** Ang istandard nga pwersa sa kada prenteng gerilya amo ang isa ka kumpanya sa kada prenteng gerilya, nga may isa ka platon bilang sentro de grabidad kag iban pa nga platon nga ginadeploy para magsakop sa mas malapad nga erya. Maayo nga may isa ka platon kada munisipalidad sa isa ka distrito nga sakop sang isa ka prenteng gerilya. Dapat tinguhaon nga padamuon ang mga prenteng gerilya halin 128 pakadto pakadto 170 para masakop tanan ukon halos tanan nga distritong rural sa pungsod.

Kada munisipalidad kag baryo sa prenteng gerilya dapat may yunit sang milisya sang pumuluyo nga magauyat sang hilikuton pangpulis. Sa kada lebel, dapat magtukod ang mga organisasyong masa sang mga yunit pangdependa. Reserba kag dugang nga pwersa sang hangaway sang banwa ang mga milisya sang pumuluyo kag mga yunit pangdependa.

Halin sa malapit nga prenteng gerilya, mahimo nga magdeploy sang mga yunit sang mga armadong partisano sa syudad sa mga pat-ud nga misyon sa mga distrito sa kasyudaran. Ang amo nga mga yunit dapat pagapasakupan sang mga kaupod nga kabisado ang kalupaan kag kahimtangan sang distrito sa kasyudaran. Lakip sa ila misyon ang mga operasyon pang-aresto, pagsilot, pagpanabotahe base sa husto nga pagpaniktik kag pagpanilag.

**4. Ipatuman ang minimum nga reporma sa duta tubtub sa pinakamataas nga masaranggan nga le-**

**bel.** Dapat ipatuman ang minimum nga programa sang reporma sa duta nga may pagkunsiderar sa limitadong pwersa sang Partido, hangaway sang banwa kag kahublagan sang mangunguma kag sa kinahanglan nga maghatag sang konsesyon sa mga manggaranon nga mangunguma kag mga agalon nga mayduta nga indi daku kag despotiko kag nagasunod sa mga layi sang demokratikong gubyrno sang pumuluyo kag nagabulig sa mga rebolusyonaryong pwersa.

Ang hangaway sang banwa pwede maghimo sang mga tikang para kuhaan sang ikasarang ang daku kag despotiko nga agalon nga mayduta nga padalaganon ang ila negosyo kag pwersahon sila nga maghalin kag abandonahon ang duta. Pwede man himuon ang amo nga aksyon batuk sa tanan nga klase sang manug-agaw sang duta, lakip ang mga korporasyong agrikultural, mga empresa sa pagtroso pang-eksport, mga kumpanya sa pagmina kag mga negosyante sa duta. Mahimo nga tulu ngaon ang abandonado nga kadutaan sa mga mangunguma nga wala sang duta para sa produksyon sang pagkaon kag reporma sa duta.

**5. Ipatuman ang maksimum nga reporma sa duta kon sa diin posible.** Dapat ipatuman ang maksimum nga reporma sa duta sa pagkumpiska sang duta kag libre nga pagpanagtag sa mga mangunguma nga wala sang duta sa mga lugar kon sa diin ang pwersa sang Partido, hangaway sang banwa kag kahublagan mangunguma bastante sa amo nga katuyuan kag kon sa diin ang mga agalon nga mayduta nadulaan na sang gahum kag naghalin na sa kadutaan.

Lakip sa paghanda para sa maksimum nga programa sa reporma sa du-

ta ang pagwasak sa gahum pampulitika sang mga despotiko nga agalon nga mayduta kag pagpiang sa nagabato nga korporasyong agrikultural, mga empresa sa pagtroso pang-eksport, mga kumpanya sa pagmina kag mga negosyante sa duta.

**6. Palaparon kag padalumon ang baseng masa.** Palaparon kag konsolidahon ang organisasyong masa sang mga mamumugon, mangunguma, kababainhan, pamatan-on, aktibista pangkultura, mga bata kag iban pa nga sektor. Tukuron ang mga organo sang gahum pangpulitika sa lebel sang baryo, munisipalidad kag distrito angkon ang suporta sang mga organisasyong masa. Tukuron ang mga komite nga nagapamuno sa pang-adlaw-adlaw nga hilikuton kag mga kampanya para sa edukasyong publiko, ikaayong lawas, depensa sa kagalingon, reporma sa duta, produksyon, pag-areglo sang mga banggiayan kag mga hilikuton pangkultura.

Sa pagtukod sang baseng masa, may napatuhaw nga mga kadre kag aktibista. Sila ang pagakuhaan sang resorsa sa pagtukod sang Partido sa mga lokalidad kag pagrekrut sang mga Pulang hangaway. Maayo nga paghanda ang hilikuton pangmasa para sa gusto nga mag-entra sa BHB.

**7. Pauswagon ang mga prenteng gerilya bilang tungtungan sa pagtukod sang relatibo mapag-on nga baseng purok.** Ang mga prenteng gerilya nagauswag pakadto sa relatibo mabakod nga baseng purok sa pagsugpon-sugpon kag pagbasog sang mga ini sa pagpamuno sang mga komite sang Partido kag mga kumand sang hangaway sa lebel nga prubinsya kag rehiyon. Ang pagtingob kag pagsugpon sang mga prenteng gerilya bilang mga relatibo mapag-on nga baseng purok sa palaabuton matabo halin sa nagapadayon nga koordinasyon sang pagpamuno sang Partido kag kumand sang hangaway sa pangprubinsya kag pangrehiyon nga lebel.

Magaguwa kag magabaskog ang

relatibo mabakod nga purok sa pagdamo sang mga pangpulitika kag pangmilitar nga kadalag-an sang inaway banwa kag sa pagluya ukon disintegrasyon sang nagahari nga sistema sa lain-lain nga lebel.

**8. Siguraduhon ang bastante nga resorsa pang-ekonomiya kag pangpinansya para sa pagdumala, operasyon kag programa pangkatilingban.** Permi pat-uron ang bastante nga resorsa pang-ekonomiya kag pangpinansya para sa pagdumala, operasyon kag mga programa pangkatilingban nga ginapatuman sang PKP, BHB kag mga organo sang gahum pangpulitika. Indi magnubo sa tatlo ang makuhaan sang amo nga resorsa.

Una, may mga proyekto pangproduksyon ang hangaway sang banwa para sa kinahanglanon sini. Nagahimo man sang amo nga proyekto ang mga organisasyong masa para sa hangaway sang banwa.

Ikaduha, pwede ihatag sa BHB bilang boluntaryo nga kontribusyon ang rasonable nga bahin sang mga benepisyo sang reporma sa duta kag proyekto nga pangkooperatiba.

Ikatlo, sandig sa direktiba sang Partido ukon sang demokratiko nga gubyerno sang pumuluyo, bilang ahensya nga tagapatuman, nagapangolekta sang buhis ang hangaway sang banwa sa mga produktibo kag nagakita nga operasyon nga mga negosyo nga wala ginapanag-iyahan sang masang anakbalhas. Magabaton ang hangaway sang banwa sang parte sang nakolekta nga buhis suno sa regular sini nga badyet.

**9. Ipatuman ang mga mandu sang hukmanan sang pumuluyo nga arestuhon agud imbestigahan kag bistahon ang nagalap sa tawhanong-kinamatarung, mga manugdambong kag iban pa nga kriminal.** Sa basehan sang panugod nga ebidensya nga ginasumiter sang pumuluyo kag sang hangaway sang banwa paagi sa manug-imbestiga sang pumuluyo, ang hukmanan sang pumuluyo nagapagwa sang manda-

**Permi pat-uron ang bastante nga resorsa pang-ekonomiya kag pangpinansya para sa pagdumala, operasyon kag mga programa pangkatilingban nga ginapatuman sang PKP, BHB kag mga organo sang gahum pangpulitika.**

myento para arestuhon ang mga ginasuspetsahan nga may kahimuan, mga kahimbon kag nakapangin-pulos sa mga kaso sa paglapas sa tawhanong-kinamatarung, mga pagpangdambong, pagbaligya sang droga kag iban pa nga krimen batuk sa pumuluyo.

Ginaproteksyunan kag ginabuligan sang demokratikong gubyerno sang pumuluyo ang mga biktima kag saksi sa mga nasambit nga krimen.

Kon nahibal-an nga ang mga suspetsado nga kriminal armado kag delikado ukon protektado sang mga armado nga badigard para makahas nga magbalibad magpaaresto, dapat himuon sang manug-aresto nga tim kag mga kabulig sini kag kinahanglanon nga paghalong kag paghanda. Sandig sa mandamyento de aresto, otorisado ang manug-aresto nga tim nga depensahan ang kaugalingon sa armado nga pagbato sang mga suspetsado nga kriminal.

**10. Hugton ang kooperasyon kag koordinasyon sang mga rebolusyonaryo nga pwersa sa kaumhan kag kasyudaran.** Ginakumbinsi ang mga kadre kag mga aktibista halin sa sahing mamumugon kag mga pamatan-on nga nakatuon nga magalagad sa pumuluyo sa kaumhan ukon mag-entra sa hangaway sang banwa. May mga rekisitos ang inaway banwa nga pinakamaayo nga mapatuman sang mga kadre kag aktibista halin sa kasyudaran. Dapat hatagan sang kinahanglanon nga suporta kag bulig sang mga likom nga tinawo sang Partido ang mga tim sang hangaway sang banwa nga may ginapatuman nga misyon sa kasyudaran.

**11. Ipahibalo sa pumuluyo sang kalibutanon ang aton inaway banwa.** Ang makatarungan nga rebolusyonaryong handum sang pumuluyong Pilipino dapat ipahibalo sa

pumuluyo sang kalibutan agud makuha ang suporta nila. Ang pagpanghimulos kag pagpamigos nga ginaantus sang pumuluyong Pilipino kag ang rebolusyonaryong paghimakas nga ginalunsar nila dapat ibalita sa bilog nga kalibutan. Dapat maabtik nga ibalita ang tanan nga signipikanteng aktibidad kag mga kadalag-an sang hangaway sang banwa, lakip ang mga inaway, hilikuton masa, edukasyon, pagtatap sa ikaayong-lawas kag hilikuton kultural.

**12. Mag-amot sa pagsulong sang pangkalibutanon nga paghimakas para sa pungsodnon nga kahilwayan, demokrasya kag sosyalismo.** Sa espiritu sang rebolusyonaryo nga internasyunalismo, ginahimo naton ang tanan para isulong ang demokratikong rebolusyon sang banwa. Ini ang pinakamaayo nga maamot naton sa komun nga paghimakas sang pumuluyo sang kalibutan batuk sa imperyalismo kag reaksyon kag para sa pungsodnon nga kahilwayan, demokrasya kag sosyalismo. Ginatumod man naton nga aton ang rebolusyonaryong paghimakas kag kadalag-an sang iban pa nga pumuluyo.

Sa amo man, dapat naton tinguhaon nga mag-angkon sang kongkreto nga suportahanay kag pagbuligay sa iban pa nga pumuluyo sa maabot sang aton masarangan.

Makabayluhanay kita sang mga inagihan paagi sa mga publikasyon, seminar kag kumperensya. Pwede kita nga magbayluhanay sang mga kadre sa mga programa sang pagtuon kag paghanas. Dapat kita magtinguha nga sakdagon ang internasyunal nga paghiliusa kag mag-amot sa pagsulong sang mga rebolusyonaryo nga paghimakas sang pumuluyo sang kalibutan. AB

## Pila ka paathag

<sup>1</sup> Ang Great Depression ukon Daku nga Depresyon amo ang pangkalibutanon nga krisis sang kapitalismo nga nagsugod sa US sadtong 1929 kag naglawig tuhtub kabilugan sang dekada 1930 kag una bahin sang dekada 1940 sa iban nga pungsod. Ginatampukan ini sang malawigan nga indi pag-andar sang mga pabrika kag malaparan nga disempleyo kag kabudlayan. Gintinguhaan nga lubaron ini sang New Deal ni Pres. Franklin Roosevelt paagi sa mga programa nga pang-engganyo sang produksyon kag pangkonsumo. Pero sa ulihi nga bahin, ang pagsulod sa Ikaduha nga Inaway Pangkalibutanon ang aktwal nga nagpatapos sini.


<sup>2</sup> Ang *demand-pull inflation* amo ang pangkabilugan nga pagtaas sang mga presyo resulta sang nagapadaku nga demanda nga indi sarang masabat sang suplay.

<sup>3</sup> Ang *derivatives* amo ang sari-sari nga instrumento ukon papeles pangpinansya nga ang presyo nakadepende sa presyo sang ginkuhaan sang kapital pareho sang mga pautang, sapi, bono kag iban pa.

<sup>4</sup> Ang bukal nga *high-tech* nagatumod sa ispekulasyon sa sapi sang mga kumpanya sa patag sang teknolohiya kag nakabase sa internet nga artipisyal nga nagpadaku sa balor sang mga sapi sini sadtong 1995-2001.

<sup>5</sup> Ang 401k amo ang plano para sa pagretiro sang mga mamumugon sa US. Sa iskema nga ini, mahimo nga iga-puhunan sang isa ka mamumugon ang iya mga sinuptan nga indi magbayad sang *income tax* tuhtub wala niya ginakubra ang kwarta nga sinuptan kag ang iya kinitaan.

<sup>6</sup> Ang mga *structural adjustment program* mga polisiya pangpinansya nga ginapapanaog sang IMF kag World Bank sa mga atrasado nga pungsod nga nagahingyo sang mga dugang nga pautang. Ginapagwa nga ang mga kundisyon nga ini para sa kauswagan pero ang matuod nga ginasiguro sini nga makabayad ang pungsod nga nagapangutang kag magbukas ini sa “hilway nga baligyaanay.”



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Ispesyal nga Isyu  
Marso 29, 2009  
[www.philippinerevolution.net](http://www.philippinerevolution.net)

# Mag-angkon sang mas daku pa nga kadalag-an sa inaway banwa

*Mensahe sang Komite Sentral  
sang Partido Komunista sang Pilipinas  
Marso 29, 2009*


**L**abaw ang kalipay nga ginasaulong naton ang ika-40 nga pagkatukod sang Bag-ong Hangaway sang Banwa (BHB) subong nga Marso 29 sa idalom sang absoluto nga pagpamuno sang Partido Komunista sang Pilipinas. Halin sadto, nag-angkon ang BHB sang daku nga kadalag-an sa rebolusyonaryong paghimakas sang pumuluyong Pilipino para sa pungsodnon nga kahilwayan kag demokrasya paagi sa malawigan nga inaway banwa batuk sa imperyalismong US kag mga lokal nga mapanghimulos nga sahi sang daku nga kumprador kag agalon nga mayduta.

Ginpanginbulahan naton ang tanan nga mga Pu-  
lang kumander kag hanga-  
way, mga kadre  
kag katapu

sang Partido sa BHB kag ang malapad nga masa sang pumuluyo sa ila natipon kag subong nga mga kadalag-an. Ginahatag naton ang pinakamataas nga pasidungog sa tanan naton nga rebolusyonaryong martir kag baganihan. Ang aton mga kadalag-an halin sang gintukod ang Partido kag BHB naangkon naton bunga sang aton matayog nga rebolusyonaryong prinsipyo, kaisog, pasensya, pagpursiger, matutom nga mga paghimakas kag mga sakripisyo.

Ang BHB subong amo ang pinakadaku nga rebolusyonaryong hangaway nga napundar sang pumuluyong Pilipino sa bilog nga pungsod. Mas daku kag mas mabaskog ini sa rebolusyonaryong hangaway sang Pilipinas nga nagbato sa kolonyalismong Espanyol sadtong 1896-

1898 kag batuk sa imperyalismong US umpisa 1899. Mas daku kag mas mabaskog man ini sa Hukbong Mapagpalaya ng Bayan laban sa





## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)